



Vanjvei Ndwencieng Nanzlumz Haenx

难忘的春节晚会

贵港市覃塘区蒙公乡古山小学三年级 覃晓婧

Bineix ndwencieng mbanj gou hai ciengz vanjvei he, neix dwg mbanj gou baez daih'it hai vanjvei.

Vanjvei seizgan dingh youq ndwencieng co' ngeih banhaemh, youq cauhsangz hagdangz hai. Co' ngeih ngoenzhaenx, vunz ndaw mbanj bouxboux cungj gig nyaengq. Dou gyoengq lwnyez hix maqmuengh ciengz vanjvei neix vaiqdi daeuj-

daengz. Banringz seiq diemj cung, gou caeuq daxmeh daeujdaengz hagdangz. Gyoengq yenjyenz gaeng youq gizhaenx cangndang lo, yawj gyoengqde cang ndaej geijlai ndeiyawj ha, gou hozhaenz raixcaix.

Vanjvei hainduj lo, bouxcujciz bauq cezmuiz le, gyoengqvunz sikhaek dingh roengzdaeu, sing gyonglaz, sing bauqva yiengj hwnjdaeu, lo,

nauhyied raixcaix. Gou caeuq daxboh naengh youq baiz daihngaih baihnaj daizheiq, youq gizneix gou gojyij yawjraen daengx aen daizheiq. Daih-it aen cezmuiz dwg diuqfoux 《Goengheij Fatcaiz》, gou yawjraen daxmeh youq ndawde diuq, gou yiengq daxmeh hemq sing he, daxmeh dingq mbouj nyi, daxmeh cij goq nyinhcaen diuqfoux. Daengz doengzhag hagdangz

dou byaujyenj 《Foux Faexsoux》 aen cezmuiz neix lo. Mwngez yawj, gyoengq dahcej daeggo diuq ndaej geijlai ndeiyawj ha! Gou geijlai siengj hix hwnjbae diuq ha. Foux faexsoux diuq sat le, gyoengq vunz cungj bek fwngz sasa. Seizgan gvaq ndaej gig vaiq, yaepyet daengz gyanghaemh cibngeih diemj cung lo, hoeng baihlaj gyoengqvunz lij gig nyinhcaen yawj byaujyenj.

Baez vanjvei neix hai ndaej gig cwnzgung, doenggvaq baez vanjvei neix, ndaej rox mbanj dou bouxak gig lai, mehbaj mehsimj, bohlungz boh-au, dahcej daeggo caeuq lwnyez bouxboux cungj rox ciengqgo diuq-foux. Haemh vanjvei neix geijlai hawj vunz nanzlumz ha! Gou gig maqmuengh bimoq ndwencieng vaiq-di daeujdaengz, gou hix aeu hwnjdaiz bae ciengqgo diuqfoux.

(指导老师:李丽君)

Seiqgeiq Ranzmbanji

家乡四季

贵港市覃塘区蒙公乡双龙小学 三年级(2)班 陆馨柳

Ranzmbanji gou youq laj dinjbya, seiqhenz cungj dwg bya'ndoi goengq lien goengq, couh lumj duzlungz heux bae heux dauq ityiengh. Ranzmbanji gou yienznaeuz mbouj lumj ndawsingz yienghhaenx nauhyied fuengbient, hoeng seiqgeiq cix gag miz gij daegsaek de.

Seizcin, gwnz bya gofaex did ok nyod moq, maj ok mbaw oi, heuswdsd mwncupcup. Ndaw rij raemx laecoco, duzvaiz iq youq henz rij youzbyaij, gyoengqde miz mhangj ngaem gyauej roengzdaeu ndoet raemx, miz mhangj buet bae buet dauq. Ndaw naz gyoengqvunz cingq nyaengq ndaemnaz.

Seizhah, mbwn rongh le, diuzdah naj mbanj couh hainduj nauhyied hwnjdaeu lo. Vunz ndaw mbanj bae ndaw dah saeg buhvaq, caemxndang, gyoengq lwnyez youq ndaw dah youz-raemx, guhcaemz, dox baeuh-raemx, raemx sinz deng gyoengqvunz youq henz dah saeg buhvaq, daengx ndang cungj mbaeqmbatmbat lo, gyoengqde cawz ndaq geij coenz le, hix mbouj miz maz banhfap sawj gyoengq lwnyez dingz roengzdaeu. Henz dah cungj dwg ganggangj riuriu, nauhyied raixcaix.

Seizcou, ndaw doenghnaz haexnaz henjrwdrwd, yawj

mbouj raen henz, rumz iq ci gvaqdaeu, fan hwnj langhgim fubfub febfab, gyoengqvunz youq ndaw naz cingq nyaengq dwk sou haex, bouxboux angq raixcaix.

Seizdoeng, gwnz bya'ndoi lumj duet buhvaq mbawfaex roengzdaeu nei, cij raen nyefaex ngutngut ngeungeu. Rumz saebaek bongj gvaq byaifaex yiengjhuhu, duznoucoengz mhauj ndaej mbouj ndoj haeuj ndaw cong h bae. Noucoengz seiz mbouj seiz ndonj ok cong daeu, yawjyawj seizcin dwg mbouj dwg yaek daengz lo.

Neix couhdwg gingjsaek seiqgeiq ranzmbanji gou.

(指导老师:覃庆陪)

Cuk Duhheu

绿豆粥

贵港市覃塘区蒙公乡 高占小学二(1)班 邓良宇

Seizhah daeujdaengz lo, dienheiq ndat raixcaix, daxmeh youh cawj cuk duhheu lo.

Ngoenz ndeu, daxmeh cawj gu cuk duhheu ndeu, langh liengz cuengq youq ndaw denbinghsiengh.

Banringz cuengqhag ma, gou gwn vanj cuk duhheu ndeu, va, cuk duhheu liengzsis, youh rang youh diemz, caen ndei gwn ha! Gou gwn le, couh okbae dwk lamzgiuz lo. Hozhawq le, gou youh dauqma gwn cuk duhheu, gou hai denbinghsiengh baez yawj, raen cuk duhheu noix bae haujai, gou gig hozndat, ndawsim siengj: ldingh dwg song boux biujgo gwn lo. Yienghneix, gou aeu mbaw ceij daeu sij naeuz: Biujgo hung caeuq biujgo iq, sou mbouj ndaej caiq gwn cuk duhheu lo. Yienzhaeuh nem gwnz ciengz bae, lij sing hung doeg okdaeu. Daxmeh dingqny le, unqswnh naeuz: "Mwngez mbouj ndaej yienghneix guh bw, song boux de dwg biujgo mwngez, gyoengqde hix hozhawq, daihgya doxcaez gwn." Gou lij mbouj fugheiq naeuz: "Gyoengqde mbouj ndaej gwn baenz lai, mboujne, gou ngoenzcog couh mbouj miz cuk duhheu gwn lo." Daxmeh ndaq gou: "Daeglwg ged neix, miz ndei gwn aeu caeuq daihgya itheij gwn cij van, gag gwn gaz hoz bw."

Gou dingq gij vah daxmeh le, caiq mhauj ndatheiq lo. (指导老师:朱卫明)



Duzmeuz Dwgyaez

可爱的小猫

贵港市覃塘区蒙公乡凌寺小学二(1)班 邓戩

Ranz gou ciengx miz duz meuz ndeu, gij bwn gwnz ndang miz hau miz henj, caen dwgyaez, gou an aencoh hawj duzmeuz heuh "mihmih". Mih-mih aen'gyaej luenzlili, doiq da ronghrikrik, baez daengz gyanghwnz laepngaungau, couh lumj song aen daengbau rox fat rongh nei, couhcinj duznou buet ndaej gig vaiq, hix deuz mbouj gvaq lwdga rongh mihmih. Rwx mihmih gig raeh, mbouj lwnh duznou gangj vah geijlai sing iq,

mihmih hix dingq ndaej nyi. Seiq cik ga mihmih mbaeumbet, byaij loh cungj mbouj miz saekdi sing.

Mihmih gawq dam ninz youh dam guhcaemz. Gyangngoengz cungj raen mihmih ninz, miz vunz byaij gvaq henz, de hix dwg hai da yawj mbat he le, youh laep da ninz lo. Ninz gaeuq le cij hwnjdaeu ietiet hwet, ajaj bak, saenqsaeng aenndang, byaij yotyot bae guhcaemz. Ndaw gyanghongh, gwnz veizciengz, dingjranz de cungj bae

youz daengz. Miz seiz lij daj giz sang diuq roengzdaeu, hix mbouj lau in.

Mihmih gaeb nou gig ak. Baez dingqny sing duznou, couh sikhaek coemj gvaqbae, baez coemj dawz duznou, bak couh haeb, yaepda duznou couh deng haeb dai lo. Seizneix ranz gou duznou cungj mbouj gamj daeu lo.

Duzmeuz ranz gou caen ak, gou gyaez duzmeuz ranzgou.

(指导老师:陆小媚)